

續  
碑  
傳  
集



續碑傳集卷六十一

江陰繆荃孫纂錄

忠節八

湖北崇陽縣知縣師君墓志銘

魏源

道光二十有一年十二月十二日湖北武昌府崇陽縣生員鍾人杰聚黨偏城劫官知縣師長治死事賊遂陷崇陽通城大戰官兵明年正月賊平湖廣總督奏師君遇害始末

詔賜卹如例部議予世襲雲騎尉君故與源同鄉試官內閣又獲交於君之伯父前海州知州亮采故其歸葬也海州命源志其事且銘其幽鳴呼崇陽之事僅爲君歎悼哉崇陽圍萬山中胥役故虎而冠凡下鄉催徵錢糧漕米久魚肉其民生員鍾人杰金太和者亦虎而冠與其黨陳寶銘汪敦起而包攬輸納不數年皆驟富與縣胥分黨角立前知縣折錦元憤不治事一惟胥役所爲致兩次闕漕據巡撫伍長華所批漕石加收一斗之數造扁送縣毀差房武昌知府明峻惟以調停姑息於是姦民日肆湖廣督撫劾罷折錦元以金雲門往署縣事禽金太和置武昌獄勢少戢是年九月而師君至鍾人杰聞上游檄捕甚急疑其仇

生員蔡紹勳所主使也約黨渡河篡取之至則紹勳已遁入城卽賊其家焚其廬并率數百人躡逐入城城門已閉內外鼎沸知縣師君登城諭之不退城內兵役矢石相持竟夜質明城外人益眾踰缺入大索蔡紹勳不得執知縣追令申狀言蔡紹勳作亂鍾人杰倡義助捕反者并請上司釋金太和歸縣時武昌知府明竣以事在蒲圻距崇陽一日程師君先令其長子懷印潛出城請明竣來縣彈壓而明竣急回武昌於是眾益張師君遂罵賊死妾吳氏及姪女皆殉之師君莅任甫百日收漕無耗羨鍾人杰無可歸罪乃櫟斂而哭祭之言己以報仇倉卒誤害良吏事不獲已遂劫庫獄散倉粟造幟械勒境內四十八堡堡出人若干不從者殺然烏合鄉民無槍械距省僅二百餘里使省城以兵數百星夜馳赴立可散黨禽渠而武昌督標兵因夷寇調赴江浙存城無幾總督裕公以兵二百駐咸甯距崇陽百里以俟提督之至賊得日夜脅從眾數千陷通城又攻蒲圻攻通山眾至萬餘幸官兵挫之蒲圻城外殺賊千餘湖南兵亦分守要隘脅從半散明年正月十八日提督劉允孝至先張疑兵大路而正兵由蒲圻進剿黨羽瓦解鍾人杰窮蹙就縛前後調湖南北兵五千餘請帑二十餘萬所獲首從各犯文武生員至

十餘人嗚呼

國家轉漕七省二百載來幫費日重銀價日昂本色折色口浮以困於是把持之生監與侵漁之書役交相爲難各執一詞弱肉強食如圖無端及其癰潰俱傷兩敗雖有善者亦末如何而或代受其禍近年若浙之歸安仁和蘇之丹陽震澤江西之新喻屢以漕事興大獄皆小用兵而崇陽則大用兵不甯惟是距崇陽事未二載而湖南耒陽復以錢漕浮勒激眾圍城大吏至調兩省兵攻捕於瓦子山曾波洲彌月始解散俘生員歐陽大鵬等於京師論功行賞與湖北崇陽一轍嗚呼僅爲師君悼歎哉君道光己卯科順天鄉試舉人前任浙江上虞縣死時年四十有五妻某氏以奉母留揚州不與其難子世杰以某年月日歸葬陝西韓城之某原銘曰

國家大政食與戎漕窮肇兵相激春豪民豪胥維蠹同蚌鷸相持乃相攻吁君之難民之恫維賊猶存三代公崇陽未已耒陽從大刑屢修誰剋窮易文訟師繼需蒙膠庠獄亦承平功法窮匪變云胡通嗚呼漕賦安所終

知府銜廣西龍州同知王君墓表

王基



粵自道光二十六年間李沅發等肇亂羣盜熾然李嘉耀陳亞貴等數十起各以數千百眾豺狼奔突南甯平樂賓州遷江十餘府州縣城橫行攻掠甚或破焉而時賊志惟在焚劫剽奪往往流而不守守吏苟安偷活者多疆臣始務覆匿因之不加察也而龍州同知王君時獨以殉難聞君諱淑元自號秋查浙江鄞縣人道光辛巳舉人考取景山官學教習數會試不第而教習期滿得官知縣分發廣西歷署雒容馬平等縣一充廣西壬辰科鄉試同考官補天保縣知縣俸滿調臨桂縣知縣升龍州同知加知府銜署太平府知府事旋復爲龍州君性淡雅博聞多識尤工書平時好以詞翰自娛及官粵西所歷偏簡一以撫綏不擾爲治吏民親睦公庭如水雖組袍羸馬而雅歌飲酒蕭然自得調臨桂首邑稱煩劇君雖簿書奔走勞瘁而猶以其燕私時與門生幕僚講論遊息願所至事理而人安之屢以歷資卓異薦聞旣滿臨桂任其替者某君以增民稅錢事致縣幾闕時值久旱城鄉集眾洶洶禱雨城隍遂綴某神祠中不得出君聞單騎馳往解之且爲眾言時方銀貴錢賤縣官爲民輸納所以不已而議增錢之故事乃平於是人知君之得民若此深也粵盜旣熾君乃翻然厲精鉤距所至以嚴毅稱太平境盜尤

眾咸切齒君道光二十九年復莅龍州時州城敝陋巨盜陳三突以二千餘人薄城君與士民誓守時巡撫某公荃孫謹家此諱盜堅有告盜者輒變色起君與某公雅故於官中事一循故事公牘申聞舉實而已龍事亟君力盡知不可得援乃衣冠出坐堂皇城破盜入而厲訶之盜眾始擁君出弗敢傷君一子從將及郊盜益眾君訶益厲盜乃戕君一臂及舌君猶嘆血面歎盜死盜沈之江一子殉及盜去三日矣龍民始出君尸身首皆裂獨面色如生云嗚呼君以文學而爲吏然乃所謂安靜吏也使世吏皆如君則亂可不作卽亂作而可不如是亟以君平時溫溫如彼而及難烈烈如此此其風果何如者哉君死一年粵盜日猖陳三等雖滅而逆全之禍大作有龍門司巡檢曰馮元者當逆全擾象州亦衣冠坐堂皇與其二子皆死事與君殊相類而粵之繼君以城殉者惟署永安州吳江署全州曹燮培賊於是踰嶺出勢滔天矣君之難前署巡撫周公天爵奏焉弗詳得如例卹子四某某某某其三某實從難四光頌以軍功由巡檢擢知縣仍候補粵西錫拯蓋君壬辰同考所薦士也受君雅知光頌請爲揭墓之文曷敢辭時在咸豐某年月日

邑侯王公諱鼎銘字新之彝軒其號也山東嶧縣人由廩貢官中書除新田縣知縣道光九年八月莅任自桂陽州微行至邑投城隍廟宿默禱神匡所不逮入署常坐堂後吏非召莫入民有屈則籲而進設帷坐榻上日夜披牘憊則伏案雖盛寒暑不少輟判決限以旬日有疑輒潛訪之得其情乃已勘驗簡廉從饗餼自具市物悉依民價十年夏旱公周行田野無倦日禱於城隍不雨又禱於火神不雨乃自械跪暴烈日中自辰至午祝且泣是夕雲起東南竟西北雨徧人心大愜書院舊設文昌位於講堂公以師座未安別構講堂兩縣試公而明士咸服朔望讀法慮民難盡曉恭刊

聖諭及易犯條律竝諸格言徧布市村墟兩載餘邑人士頌其德政將梓以行公曰毋君等曷指陳邑中利弊使我不至失誤若聲聞過情余滋愧矣十二年正月公在省垣聞江華逆獠趙金龍之亂慮煽邑獠二月初歸卽冒雪步歷徭棚諄諄譬諭賞賜其老幼回署復召獠長曉以國法賜酒食給身符以安其心是時邑千總李英帶兵赴江華金龍犯藍山甯遠逼邑境公與教諭羅廷贊訓導陳詩率紳士日練鄉勇以守突聞提督海凌阿副將馬韜被害池塘墟公慮城庫且塌不可徒守語



陳與羅曰君等守我督眾禦諸境二十一日分領鄉勇百餘堵十字墟時賊勢愈張甯遠禾亭墟及邑之南境橋下洞諸處連遭焚掠眾惶惑公曰爾怯乎可退我將往以大義曉之居民泣阻乃還二十三日晡或報曰賊至矣城中驚竄不知所往公朝服北面拜坐堂皇以待書於几曰爾果仇我新田當殺我切勿傷我百姓是時隨公者鄭忠李政二僕爾典史丁禧至公指三尺練曰城亡吾亡於此矣羣吏至公曰爾亦不畏死耶俄而百姓哭拜於堂下公哭僕亦哭典史羣吏皆哭公口不能言麾以手而已正訣絕聞外委莫亮策騎至曰賊駐查林鋪距城尙十五里前報者見其來未知其止也公乃定二十四日邑士民及甯遠糧陽境感公之誠心愛民如子也不謀而合者以萬計請勦賊公喜而義之乃徧告於神曰惟神有靈在天茲猺有罪將帥我師是殲是滅若獲勝神之力也不勝銘死奚恤將若蒼生何惟神鑒之卽督眾行眾咸踴躍直抵窩塘距查林鋪里許於是邑東鄉勇由東路進邑南鄉勇由南路進邑西甯東鄉勇由西路進邑北桂南鄉勇由北路進賊聞大驚乃前扛大礮後列鳥槍分隊出眾有難色退守百餘步或登高呼曰此空礮也亟奪之賊舍礮持槍刃併力齊赴眾奮擊之殺賊無算生禽十九



人邑北鄉勇胡文輝正與賊拒忽放槍輝仆賊刺輝輝隨起刃之身中  
賊傷其弟文榮甫斃賊回顧輝負而逃是役也眾與賊相持至暮陣亡  
者百有奇武生鄭奇光與焉二十五日邑之人合甯之人及桂之臨泰  
大富諸鄉人眾約二萬公欲以身先百姓泣阻曰公自愛毋以身試險  
公曰我不先則士心不一焉能制勝遂策馬率邑北桂南鄉勇出城南  
經花涼亭至牯牛岡北距查林四里諸勇鱗次疊會時賊數十在窩塘  
之野見眾至作奔竄狀眾遂追之賊復突出槍礮聲如雷死者無算先  
是賊密約土獠供送藥丸邑之獠未肯負公也備而未送先一夜賊入  
峒脇取之故槍礮復烈眾遂潰眾欲擁公逸去公曰爾等先走我殿後  
可無虞眾躊躇河南王白者邑流人也膽力大呼曰不可走眾護公  
賊追至大肆擊殺公回顧勸曰賊奴殺我百姓曷殺我遂中礮落馬猶  
罵不絕口李政坂之白負走賊擊白傷腦遂舍公賊憤公剎兩目斷其  
項備極慘毒焉二十七日城陷賊據之縱火焚廬舍火無燄每夕聞兵  
馬聲達旦賊驚懼三十日黎明遂遁鄉民得公首於查林得公尸於牯  
牛岡之桐子坳舁歸城隍廟焚香拜哭其門下士邑人王尙賓以禮斂  
焉公莅邑三年未攜眷屬其出禦寇也先授鄭忠印告之行曰若我生

還則爾返不則持以投上官且歸告先靈諭我子來收我尸邑距嚀四  
千餘里往還百餘日外未閉棺待公子來也公甥張繼載在河南聞變  
先公子來迎柩九十二日矣啟視之面目如生公子澤溥孫映庚映軫  
事聞

贈卹如例

廣西署隆安知縣死節高君筠坡家傳

宗稷辰

君諱延祉字受民別號筠坡宋扈蹕南渡忠節太傅公世則之後多爲  
越人而君家著籍蕭山自曾祖考贈編修諱錦堂祖考諱西賡父蘅晚  
封君諱蘭三世爲名諸生封君五子君其伯氏也弱歲遭母喪哀毀逾  
常人道光庚子與弟延祐同登順天

恩科鄉舉明年同取官學教習會海上有事從軍幄領義旅頗有勞旣  
奏敘以撫議成撤罷仍教習

景山官學滿三載引

見以知縣注選遊皖江久之庚戌復試取國子監學正補次緩仍就縣  
令咸豐元年二月廣西寇擾州縣多缺請揀員顧選人率遂巡君獨慷  
慨赴揀

命往無難色與都下戚友別曰家有老親何敢鹵莽從事然已受百里之寄卽當以身奉

國萬一力竭有委馬革耳初至桂林勞辛階嚴仙舫二公賞其才氣卽檄權隆安縣縣巖險城敝君至請兵任勦守募死士三百親爲教戰於是繕垣堞勤團練計獲賊首陸鵬理誅之並戮其黨蔡亞全等七十餘人焚巢夷墓境內以肅是秋股首凌亞東擾思恩之感墟勞公方辦南路勦務檄君與右江四邑會勦乃偕土知州黃爲錦毅然入袍墟捕斬六賊十月初三日將至感墟密箐中伏寇起君麾義勇殺賊二百餘賊浸眾或勸退避君叱之曰是何以對天下士乎挺刃督戰不少卻腹中賊予以十月四日與黃爲錦同死於陣尸久不得迄十二月孤子彥冲尋得父屍於白山之貫村張目裂眦貌如生亡何官兵搜捕空谷中聞呼凌亞東名者乃尋聲偵獲之勞公命剖心祭君皆謂君之靈爽能殺賊云事聞奉

詔優卹給祭葬予世職尋又許本籍建專祠惟贈諡尙有待也君在隆安七十餘日無日不枕戈衽甲居廨數日耳而民感其保衛之誠勇爭賻其孤孤立辭曰敢以此違先子之志民遂以其資祠君以從死之僕

隸壯勇耐焉嗚乎蘅晚君有子克忠君有子克孝皆足爲忠節光矣君弟延祐以狀屬其叔父之同年生宗稷辰因次其事爲傳且作論曰越故多志節之士嘗考我

朝死

王事者亦將百人道光中海上之變武職死者葛壯節一人文員死者上海楊尉慶恩一人粵西亂蹂躪州邑以數十計高君甫入仕能死綏以盡臣節視前之逃死後之罹法者不貲然猶寒松之與腐草哉余力成壯節祠而君之祠尙不遑及有餘愧已

武昌知府富察公傳

徐宗亮

公諱明善字韞田世爲富察氏隸滿洲鑲藍旗父昌宜泰知河南開封府以濬賈魯河有功於民祀名宦祠公明決有吏材而以明倫爲實學嘗作明倫說自勵勵人起家筆帖式歷步軍統領司務擢郎中出知湖北荊州府公之始爲郎也軍校多假鉤緝橫索公一裁以法人稱廉明其治荊州也多善政而修萬城隍續尤偉自道光戊戌後十年閒江水數汎溢沿江郡縣患潦者幾千餘里公獨輸金修隄爲民倡歲戊申水患益鉅萬城隍屹然荊州民始賴以安公尋以循能薦



詔加道銜又二年調武昌當是時粵賊入湖南境甚猖獗武昌大府倚岳州險要不爲城守備公雖郡守然事權不專屬所設施多不見用及賊至倉卒登陴勢不支城遂陷公率眾巷戰死壬子冬十一月也事聞贈中議大夫公卒後有妾葉氏聞訃自經死而荊州諸生林天直者復以起義兵殺賊不克陣亡故嘗奉公明倫說者也世益謂公不苟死云公子慶純官郎中先卒孫恩寶以公廕爲騎都尉

徐宗亮曰予聞富察公名久俗傳壬子武昌殉節錄布政使梁公十數人外無微詞者蓋鮮而公則尤著惜所錄文近陋焉今讀公家傳別爲綴次之夫傳記史職而忠義之事足維世者文家容得而假焉蓋今史館列傳率節錄奏牘而已如公之型於家式於國者烏容以弗傳邪沈大令傳

方宗誠

君諱衍慶字子符號槐卿池州石埭人祖鵬賡父作舟俱縣學生重行檢君生而聾祖父埒耳授之書卽成誦年二十中道光乙未進士丙申補行

殿試用知縣分發江西銳意有爲尤善折獄每以小几對簿準情度理眾心洽然代理金谿四十二日卽有政聲權輿國有蕭姓爭繼已控大

府提訊矣君初下車進而語之曰吾欲爲一決何如兩造皆稽首君判以孤子無生父之命禮不爲人後又別無應繼之人因援無子耐食例以田租之半永存爲祭產則不繼而祀自不絕以其半分給周親於是邑服其明數月閒清積牘三百餘歉歲土匪藉禁米出境據河行暴客貨至抽釐違者覆其舟君廉得其情督役捕治俗以人命爲奇貨旋控旋賄和君痛懲之欺詐浸息丁外艱服闋署安義補泰和尤以除暴安良興學善俗爲務民初以抗糧成習及君治之皆踴躍輸將上官嘉其能移任時民號呼泣留者不絕其在興國安義也亦然以敘加同知銜調鄱陽鄱陽江西繁要地君旣蒞任拓芝陽書院廣育嬰堂養濟院施藥餌棉衣棺木置義冢凡興利除害事無不備鄱陽素稱盜藪君親訊漁戶編名冊置巡船梭巡其中獲盜則嚴治如法舟行肅然邑兩遇水災君先設棚山阜以移民居捐廉作餅與粥食之常敝衣雜諸句中以察厚薄多寡之數弊蠹一清振帑下按戶造冊無濫無漏數月中衣不澣食不飽衝波冒險無稍停全活民以數十萬計上官命緝私鹽君以大荒民窮藉負販爲生持不可屢受詰責不顧麥秋至君乃微行要隘遇販者告以實民感之皆復業

文宗顯皇帝登極下

詔旁求人才巡撫費公開綬學使張公芾薦君治行第一咸豐元年入覲回鄱陽萬民夾道以迎當是時粵逆竄據永安沿江大吏多泄沓以爲去賊數千里也君獨憂其必下竄慨然曰上不能爲國分憂下不能爲民保命

朝廷何賴此臣子乎檠鄉守備要編十家牌傾囊爲倡製器械造戰船練丁壯十日一大閱賞罰必信鄱勇遂爲章江最二年賊果東竄三年正月十五日大雪訛言賊至民震動君短衣佩印挾弓矢縱馬出城見有掠市肆者發二矢斃一人生禽四人疾呼曰良民歸舟不用命者殺無赦眾鳥獸散君訊知爲糧艘水手播謠言惑民欲乘機劫掠也治之如律民心以安是年春金陵失守提督何榮下攻君解糧二萬石濟之五月賊復上寇南昌巡撫張公芾調君救援君星夜率勇往見密訂破賊計六月二十四日大破之又料賊必乘虛襲鄱陽也迂道回時樂平令李君仁元兼理鄱陽不肯去君曰吾土也豈可累子李君亦曰君不負我我可負君遂共籌守備甫一日而賊至值久雨秋潮大至浸饒城數尺埧處可通舟向之木椿塞河者已茫無津涯賊帆乘風蠡擁上君

視帥勇然礮擊沈之復大雨火器無所施水益闊賊船由上游逼入東門君涉水迎殺梟黃衣賊首標之竿賊退轉由北門晷水入李君截鬪君馳助未及而李君遇害君益怒奮力殺賊賊來益眾君負重傷鏖戰死之七月十四日也賊退家人尋君尸面如生裹衣徧鈴鄱陽縣印蓋自賊東竄時已備之矣年四十一事聞

贈道銜

予專祠君爲人孝友信義好尊禮賢士自幼慷慨立名節在官慕陸清獻公之爲人常讀其書方賊之未回竄也君料其不忘江楚與人書曰郡中無城可守然裹糧坐甲惟敵是求斷無因噎廢食之理每懷鄉先生金正希吳次尾之遺風不禁拔劍欲起也救援省城自撰楹聯益以取義成仁擔荷綱常自勵卒能不負所言平生論事有深識不爲苟且一時之計道光二十二年英夷議和君上書大府力陳制夷之策而決和議之不可恃侃侃數千言不十餘年而其言皆驗其文藏集中所著有槐卿遺稿六卷槐卿政蹟六卷子二人芝修棠修論曰余曩聞君治行之詳竊歎循吏者弭亂之原也以君之才使得大用於粵西賊未起之地則所以銷患於無形而止患於方來者其必有



道何至斯民之不幸若是邪及讀君論和議書又歎歷官之政績皆不足爲君道矣孔子論臧文仲曰知柳下惠之賢而不與立吾於君亦云

劉令君傳

劉壽楨

劉令君同纓者三吳之循良者也字清溪江西石城人以拔貢生令於吳辛亥來上元陸建瀛之潰於楚跳而免臥漁艇腹一日夜駛九百里還叩江甯江甯大搖戰守無可恃而劉令君於是以城守死先是壬子歲十二月

天子以武昌旣陷

詔陸建瀛建大將旗鼓防九江以利便擊賊江上下皆設戍賊狐疑莫敢東嚮而陸建瀛乃始以歲盡過安慶當此之時將軍祥厚都統霍隆武莅駐防旗兵祁宿藻爲方伯而蘇撫楊文定來助守陳鼎者士人也與吳謙吳春奎共建策十三堵禦之策五扼要察奸哨探嚴紀律招技勇守備之策八安民積糧團丁教戰據險守城備器械約號令謁劉令君以告方伯趣亟行之令君獨號召健兒得五百人於是潰警聞矣楊文定亟遁去令君出獄中盜數輩進諸廷曰嗟乎誠壯士賜之食食已則曰汝固無所得生也雖然跳盪汝職也今粵賊且至汝誠能善所死